



## Nastavljeno suđenje u predmetu Lutka

# CVIJAN SNIMLJEN SA DARKOM ELEZOM

**Vidović prigovorila na prikazani snimak, zahtijevajući da joj se odgovori ko, gdje, kad i po čijoj naredbi je sačinio snimak, te da joj se dostavi izvještaj o "ovoj radnji Tužilaštva iz Beograda"**

U nastavku suđenja u predmetu Lutka, u kojem su optuženi Bojan Cvijan i još 17 osoba zbog nekoliko teških krivičnih djela, jučer je u Sudu BiH prikazan snimak od 5. juna 2009. godine, a koji je, kako je istakao državni tužilac Džermin Pašić, snimljen između optuženog Cvijana i Darka Eleza.

### Vožnja

Na snimku se moglo vidjeti kako iz nepoznatog objekta izlazi Elez, a odmah za njim ide i Cvijan, nakon čega obojica sjedaju u vozilo beogradskih registarskih oznaka i odvoze se u nepoznatom pravcu. Cvijanova advokatica Vassija Vidović je prigovorila na ovaj tužilački dokaz, ističući da zahtijeva da joj se odgovori ko, gdje, kad i po čijoj naredbi je sačinio snimak, te da joj se dostavi izvještaj o "ovoj radnji Tužilaštva iz Beograda". Navela je i to da se radi o dokazu iz 2009. godine, koji kao takav nema nikakve veze sa optužnicom u kojoj se, kao posljednja, navode djela iz 2008.

Pašić je jučer u sudski spis uložio i nekoliko materijalnih dokaza, među njima i dokaz o međunarodnoj pravnoj pomoći, u vezi sa presretnutim razgovorima koje je Tužilaštvo BiH pribavilo iz Srbije.

Advokatica Tatjana Savić, koja brani Elezovog brata Davora, kazala je da je prema dokumentaciji evidentno da je jedno te is-



Sa jednog od ranijih ročišta

to lice, u ovom slučaju Darko Elez, prisluškivan deset mjeseci, odnosno od 22. januara do 4. oktobra 2009. godine.

- Prema Darku Elezu, a i većini drugih optuženih, posebne istražne radnje su trajale mnogo duže nego je to zakonom dozvoljeno, što znači da se ovdje radi o nezakonitom prisluškivanju, smatra Savić.

Prigovorio je na ove dokaze i Vlado Adamović, navodeći da će se "ukoliko se prihvate ovi dokazi, desiti raspad pravosudnog sistema".

- Jedno će vijeće odlučivati ovako, drugo onako, a onda ćemo mi ujutro ići kod vidovite Džemile, istakao je on.

Vidović je Vijeće, kojim predsjedava sutkinja Biljana Čuković, upitala zašto da se danima sluša nešto što nije predmet optužnice, na šta je Pašić odgovorio da

se radi "o relevantnim dokazima Tužilaštva". Tokom jučerašnjeg pretresa je preslušano i nekoliko prisluškivanih razgovora snimljenih, prema tvrdnji odbrane, između pojedinih optuženih.

### Tri ubistva

Osim Cvijana, koji je trenutno pod suspenzijom na mjestu šefa Odsjeka za droge u SIPA, a bio je i nekadašnji načelnik kriminalističke policije u CJB-u Istočno Sarajevo, ovom optužnicom su obuhvaćeni i Davor Elez, Muhamed Ramić, Admir Ahmet-spahić... Na teret im se stavljaju tri pokušaja ubistva Đorđa Ždrale, ubistva Borisa Govedarice, Zorana Goluba i Vlatka Mačara, kao i pljačka 670.000 KM iz Pošte 2 u Sarajevu, pljačka transporta novca Privredne banke Sarajevo od 2,2 miliona eura (oko 4,4 miliona KM)...

**A. B. Č.**